

Ministro Tico Croes

GOBIERNO TA CONVENCÍ CU PRONTO PUEBLO

LO SINTI Y MIRA CON PRIJSNAN DI CUMINDA TA BAHÁ

ORANJESTAD(AAN) -- Ministro di Asuntonan Económico y Turismo, Tico Croes, a duna un splicacion pa cu e inquietud reinante encuanto e medidanan.

Ministro Croes a splica cu Gobierno a cera pacto social cu gremionan. Parti di e pacto social aki ta encera cu Gobierno lo revoca e medida di 5 % y gremionan na nan turno lo percura pa cubri e gastonan pa loke ta e completacion di e redoblacion di pensioen cu lo drenta na vigor dia 1 di December 1994, caminda lo trece felicidad y un bida digno pa miles y miles di nos grandinan.


Ministro Croes a sigui bisa cu ademas di e completacion di redoblacion di pensioen, Gobierno den December lo introduci e ahustacion di salario minimo.

Croes ta haya cu ta importante pa pone e pacto social cera cu e gremionan bon cla pasobra Gobierno a cumpli cu su parti esta a duna bek e 5 % na pueblo.

Ministro Croes a bisa cu ultimamente e ta scuchando diferente discusion ariba control y tambe discusion si enberdad e 5 % aki ta bay pa pueblo of ta bay pa comerciantenan.

Croes a mustra cu e sindicato FTA a tene un marcha di protesta pasobra e sindicato ta considera cu e 5 % introduci pa Gabinete Oduber II tabata inhusto contra pueblo. Ora Gobierno AVP/OLA debilbe e 5 % aki bek na pueblo, Gobierno ta spera cu tur hende corda for di unda e origen aki ta y con e impacto tabata den pueblo.

Croes a enfatisa cu e 5 % aki mester bay pa pueblo y esaki mester ta bon cla pa tanto FTA y ATIA. Ministro Croes ta haya cu ta inhusto cu ta señala mal



gubernacion di pasado y ta relata esaki na e Gobierno actual cu tin apenas 30 dia den gobernacion.

Segun Croes, den 30 dia Gobierno AVP/OLA a demostra cu nan por cumpli cu nan promesanan. Ademas di

esaki, e Gobierno nobo a duna indicacion di bon gobernacion y tambe a duna indicacion di iniciativa pa loke ta maneho pa loke Gobierno a trece padilanti durante campaña.

Pa loke ta trata e control di

5 % ariba e prijsnan di producto, Ministro Croes a indica cu manera el a bisa, un di e tareanan grandi cu e ministerio di asuntonan economico tin ta, pa controla y reduci inflacion.

Ministro Croes ta segura pueblo cu lo bay haci esaki. Lo bay hacie mediante tres instrumento:

1. Stimula competencia entre sector priva. Ministro Croes ta kere cu esey ta hopi importante. Si compara 1986 - 1988 y 1989 - 1994 lo ripara kico e estimulacion di competencia a haci, esta a reduci prijsnan.

2. Lo duna Fundacion CAS un rol prominente den dunamento di informacion na comunidad. Den e siman aki Ministro Croes lo reuni un biaha mas cu CAS, caminda lo bay sincronisa e manera con CAS lo mester bay funciona pa yuda Gobierno den duna informa-

cion ariba prijsnan. Di e forma aki cada consumidor na un forma racional lo tuma su decision kico e kier. Si un marca di lechi resulta caro, e por cumpri un otro marca di lechi. Door di e informacionnan suministra pa CAS, pueblo lo haya sa unda tin productionan mas barata.

3. Ministro Croes ta reuniendo tur siman cu director di Asuntonan Económico, caminda ta planeando con lo bay efectua un control severo ariba e productionan cu ta cay bao control y caminda cu Gobierno mester actua unda tin violacionnan.

Ministro Croes ta convenci cu e tres instrumento- nan lo bay duna resultado y cu pronto comunidad lo mira cu en berdad prijsnan di cuminda lo baha mescos tambe lo bay cuminsa cu e proceso pa reduci prijsnan di vivienda.

NI Ariba Tera, Corda Eybao!!



TELEFONNAN
DI DIARIO
26747
FAX
28551